

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2014-yil 2-avgust, shanba № 60 (15802)



Корея Республикасининг Тэджон шаҳрида яқунланган математика бўйича халқаро фан беллашувида ўқувчиларимиз умумжамоа ҳисобида иккинчи ўринни қўлга киритишди.

Математика Олимпини забт этишди

Нуфузли беллашувда дунёнинг 31 мамлакатидан олти юз нафарга яқин мактаб ўқувчиси қатнашди. Қувонарлиси, Ўзбекистон жамоаси мусобақага илк бор таклиф этилиб, дастлабки уринишдаёқ юқори натижани қайд этди.

Юртимиз шарафини ҳимоя қилиш учун номзодлар «Билимлар беллашуви»нинг бу йилги ғолиблари орасидан сараланди. Эслатиб ўтамиз, «Билимлар беллашуви» Ўзбекистон Республикаси Халқ таълими вазирлиги томонидан ўқувчилар билимини синовдан ўтказишнинг муқобил шакли сифатида жорий этилган бўлиб, бир неча йилдан буён фан олимпиадалари тизими асосида ўтказиб келинмоқда. Жорий йилда мазкур мусобақанинг худудий босқичида етти минг нафар ўқувчи қатнашди. 520 нафари ғолиб бўлди. Ўз навбатида, бу ўқувчилар Кореядаги Халқаро математика мусобақасига йўлланилишлари қўлга киритиш учун ўзаро курашдилар.

Икки босқичда ташкил этилган махсус танлов натижаларига кўра, энг юқори балл тўплаган тўрт нафар ўқувчи — Самарқанд, Фарғона, Қашқадарё ва Бухоро вилоятлари вакиллари — терма жамоага киришга муяссар бўлди. Улар халқаро мусобақага математик олимплар иштирокида тайёрланди. Махсус машғулотларда алгебра, геометрия, сонлар назарияси, математик мантиқ, комбинаторика, тўпламлар назариясига доир мурраккаб масалаларни ечишнинг илғор усулларини ўрганишди.

Халқаро математика мусобақаси шартларига биноан, иштирокчилар-

нинг билими яқка ҳамда жамоавий тарзда синовдан ўтказилди. Биринчи турда ўқувчилардан ўн бешта масалани индивидуал ҳолатда ишлаб бериш талаб қилинди. Терма жамоамиз аъзолари орасидан фарғоналик Жасурбек Имомов энг яхши натижани кўрсатиб, мусобақанинг кумуш медалига сазовор бўлди. Шунингдек, Китоб туманидаги 1-ихтисослаштирилган мактаб-интернат ўқувчиси Юлдуз Неъматова ҳамда Олот туманидаги 31-ихтисослаштирилган мактаб-интернат ўқувчиси Даврбек Олтибоев топшириқларни жуда яхши бажаргани учун махсус сертификатлар билан тақдирланди.

Иккинчи тур жамоалар ўртасида кечди. Ҳар бирига ўнта масалани ечиш учун бир соатдан вақт берилди. Ўзбекистонлик ўқувчилар саккизта масалага тўғри жавоб топиб, 2-ўрин билан мусобақанинг ғолиблари шохуспасига кўтарилишди.

— Халқаро беллашувдан юзимиз ёруғ бўлиб қайтганимиздан бахтиёрман. Бу мустақиллигимизнинг 23 йиллигига ажойиб тухфадир, — дейди мусобақада бир йўла иккита медални қўлга киритган Бувайда туманидаги 2-ихтисослаштирилган мактаб-интернатнинг 7-синф ўқувчиси Жасурбек Имомов. — Яширмайман, баҳс қаттиқ кечди. Масала ва мисолларнинг мурраккаблигини айтмасам ҳам бўлади. Шукр, билимимиз панд бермади. Математикага болалиқдан меҳр қўйганман. Орзуим — етук математик олимп бўлиш. Халқаро мусобақада олинган тажриба билимимни чархлашга имкон берди. Турли давлатлардан дўстлар орттирдим. Уларга юртимиздаги

таълим олиш ва ўз салоҳиятимизни юксалтириш учун яратилган шароитлар ҳақида гапириб бердик. Натижасини эса хорижлик тенгдошларимиз ўз кўзлари билан кўришди.



Жасурбек Имомов



Юлдуз Неъматова



Даврбек Олтибоев



Сардор Сайткулов

Тэджон шаҳрида бўлиб ўтган Халқаро математика мусобақаси ғолиблари Тошкент халқаро аэропортида Халқ таълими вазирлиги, оммавий ахборот воситалари ходимлари ва жамоатчилик вакиллари иштирокида тантанали кутиб олинди.

Наргиза УМАРОВА,
«Turkiston» муҳбири



«Abituriyent — 2014»

Ўқишга иштиёқу баланд ёшлар сарф кенгаймоқда

1 август куни мамлакатимиздаги барча олий ўқув юртларида тест синовлари бўлиб ўтди

Президентимиз Ислам Каримов раҳнамолигида амалга оширилаётган кенг қўламли ислохотлар турли соҳаларда етук билим ва малакали, ўз касбининг устаси бўлган илғор мутахассисларга талабни йилдан-йилга оширмоқда.

Ўзбекистон Республикаси Вазирлар Маҳкамаси ҳузуридаги Давлат тест маркази маълумотларига кўра, бу йил Термиз давлат педагогика абитуриентлардан энг кўп — 27 минг 552 ариза тушган, Жиззах давлат педагогика институтига 22 мингдан зиёд, Андижон давлат университетига 21 мингга яқин, Қарши давлат университетига 20 минг 656, Тошкент давлат педагогика университетига 19 минг 720 ариза қабул қилинган. Буларнинг барчаси Президентимиз ташаббуси билан мамлакатимиз таълим тизимида кечаётган ислохотлар ёшларнинг билимга чанқоқлиги, олий маълумот олишга бўлган интилишини тобора кучайтиришдек эзгу мақсадларга хизмат қилаётганини намоён этмоқда.

Шу билан бирга, абитуриентлар ўртасидаги танлов Тошкент тиббиёт академиясининг Фарғона филиалида 1 ўринга 20,7 кишини, Қарши давлат университетида бир ўринга 16,6, Термиз давлат университетига бир ўринга 16,3, Гулистон давлат университетига бир

ўринга 15,4 нафарни ташкил этиб, бу мамлакатимиздаги энг юқори кўрсаткич бўлди.

Таълим соҳасидаги ислохотлар жараёнида реал иқтисодийнинг турли жабҳалари, меҳнат бозоридаги мавжуд талаб ва эҳтиёждан келиб чиққан ҳолда юқори малакали мутахассислар тайёрлашга устувор вазифа сифатида эътибор қаратилмоқда. Ўқув-тарбиявий ишлар муттасил тарзда такомиллаштирилиб, жаҳон андозалари ва замон талабларига мос бўлган таълим стандартлари амалиётга жорий этилмоқда. Фан, таълим, ишлаб чиқаришнинг ўзаро интеграциялашуви таъминланаётгани ёшларнинг билим олишга интилиши тобора ортишига туртки бермоқда. Ҳар йили ижтимоий-иқтисодий жабҳалар учун долзарб бўлган соҳалар бўйича янги иختисосликларни ташкил этишга алоҳида эътибор қаратилмоқда. Жумладан, 2014-2015 ўқув йилида Тошкент архитектура-қурилиш институтида «Қиймат инжиниринги», Тошкент давлат аграр университетида «Доривор ўсимликларни етиштириш технологияси» каби янги йўналишларнинг очилгани фикримизнинг далилидир.

(Давоми 2-саҳифада)

Imkoniyat

Ёш тадбиркор глобус ишлаб чиқаришни йўлга қўйди

— Танловда турли полиэтилен пакетчалар ишлаб чиқаришга мўлжалланган кичик корхона ташкил этиш бўйича тайёрлаган бизнес режам билан қатнашдим. Экспертлар бизнес режамни молиялаштириш учун «Қишлоққурилишбанк» очиқ акциядорлик тижорат банки томонидан 30 миллион сўм миқдорида имтиёзли кредит ажратиб бериш таклифини билдиришди. Агар ушбу кредитни олсам, олти нафар тенгдошимни доимий иш билан таъминлайман, — дейди Янгийўл хизмат кўрсатиш касб-ҳунар коллежи ўқувчиси Ёқутхон Калонхонова.



Бугун Ёқутхон каби ташаббускор, ишбилармон ёшларимиз «Ёш тадбиркор — юртга мададор» танловида қатнашиб, ўз бизнесини йўлга қўймоқда. Янги иш ўринларини яратиш, тенгдошларини ҳам иш билан таъминламоқда. Шу сабаб мазкур танловда иштирок этиш истагини билдираётган ёшлар сони ҳам йилдан-йилга кўпайиб борапти.

Бу йил Тошкент вилоятидан 270 нафар йигит-қиз тадбиркорлик билан шуғулланиш учун ўз бизнес режаларини танловга тақдим этган. Уларга вилоят «Ёш тадбиркор» консалтинг маркази томонидан тадбиркорликка оид семинар-тренинглари ташкил этилиб, зарур маълумотлар берилди. Ҳар бир туман ва шаҳардан энг яхши бизнес режа муаллифлари танловнинг вилоят босқичида ишти-



рок этди. «Камолот» ёшлар ижтимоий ҳаракати Тошкент вилояти кенгаши, Савдо-саноат палатаси, вилоят марказий банки, «Хунарманд» уюшмаси ҳамкорлигида ўтказилган ушбу босқичда танлов иштирокчилари учун уч кун-

лик махсус семинар-тренинг ташкил этилди. Улар билан соҳанинг тажрибали мутахассислари машғулотлар олиб бориб, тадбиркорликни тартибга солувчи меъёрий-ҳуқуқий ҳужжатлар билан таништиришди. Рўйхатдан ўтиш тартиби, кичик бизнесни солиққа тортиш, бизнес режа тушунчаси ва унинг структураси ҳамда керакли техника жиҳозларни сотиб олиш тартиблари ҳам тушунтириб берилди.

Иштирокчилар семинар давомида гуруҳларга бўлинган ҳолда ўз бизнес режаларини янада такомиллаштириш учун қайта ишлашди.

— Дунёдаги илк глобусни Беруний бобомиз яратган. Мен ҳам бобомизнинг йўлини танлаб, глобус ишлаб чиқарадиган корхона очдим. Бугунги танловда ҳам талаба, ҳам раҳбар, ҳам тадбиркор

сифатида қатнашапман. Мақсадим бутун Ўзбекистонни корхонамиз маҳсулотлари билан таъминлаш, қолаверса четга экспорт қилишдан иборат. Банкдан кредит олиб, корхонамизни янги, замонавий жиҳозлар билан таъминламоқчиман. Бунинг натижасида ўнта янги иш ўрни пайдо бўлади, — дейди «Зиё-глобус» хусусий корхонаси раҳбари, Тошкент шаҳридаги Турин политехника университети талабаси Бобур Зокиров.

Танлов якунида ҳар бир иштирокчи ишчи гуруҳ олдида ўз бизнес режасини тақдим этди. Ўн уч нафар йигит-қиз танловнинг республика босқичига йўлланима олди.

Ашуралӣ БОЙМУРОДОВ,
«Turkiston» мухбири.
Рустам Назарматов олган суратлар.

«Kamolot» loyihalari

«Ўзметкомбинат» ОАЖдаги «Камолот» ЁИХ бошланғич ташкилоти комбинат касабаси билан ҳамкорликда пўлат симлар ишлаб чиқариш цехида «Мустаҳкам оила — баркамол авлод пойдевори» мавзусида давра суҳбатини ташкил этди. Тадбир Соғлом бола йилига бағишланди.

Эртаминг учун оройдали

Унда Беқобод туман оилавий поликлиникаси, ФХДЁ бўлими вакиллари, туман бош имом-хатиби, комбинат раҳбарияти иштирок этди. Ёшлар билан суҳбат жараёнида мутахассислар ҳар бир оилада тиббий маданиятни юксалтириш, оилаларнинг саломатлигини мустаҳкамлаш, шунингдек, бугунги кунда аёллар орасида учраётган касалликларнинг олдини олиш борасида мамлакатимизда амалга оширилаётган ишлар ҳақида сўз юритишди. Ўз навбатида, цехнинг ёш ишчи-ҳодимлари оилага тайёргарлик ва турмуш муаммолари, жамиятда «мустаҳкам оила» тушунчасини қадрият сифатида қарор топтириш, фарзанд тарбияси, баркамол авлодни вояга етказиш каби масалалар юзасидан фикр алмашдилар.

Тадбир сўнгида мутахассислар ёшларнинг саволларига жавоб қайтаришди.

Бекзод ҚОДИРОВ,
«Ўзметкомбинат» ОАЖ «Камолот» ЁИХ
бошланғич ташкилоти етакчиси

Саргузаштлар ороли

Саргузаштлар ороли фақат денгиз ёки океанларда бўлади, деб ўйлайсизми? Чин кўнгилдан хоҳласангиз, уни исталган жойда сиз ҳам ташкил этишингиз мумкин. Пойтахтимизнинг Шайхонтоҳур туманида яшовчи болалар ана шундай ишга қўл уришди.

«Камолот» ЁИХ Шайхонтоҳур туман кенгаши йўналиш сардорлари «Ёзни «Камолот» билан!» лойиҳаси доирасида тумандаги 262-умумтаълим мактаби қошидаги «Қалдирғоч» ёзги болалар соғломлаштириш оромгоҳида «Саргузаштлар ороли»ни барпо этишди. Тадбир давомида ўтказилган эстафета ўйинлари, қизиқарли тест синови ҳамда савол-жавобларда сардорлар билан бир қаторда болажонлар ҳам фаол қатнашди. «Саргузаштлар ороли»да жами олтига — «Тантана», «Сеҳрли мўйқалам», «Моҳир қўллар», «Пантомима», «Билагон» ва «Жамалак» деб номланган оролчалар бўлиб, улардаги турли қизиқарли ўйинлар тадбир иштирокчиларига бирдек завқ улашди.

Жумладан, «Тантана» оролчасида барча турли қувноқ мусиқа ҳамда мультфильм қаҳрамонлари ижросидаги кўшиқларга рақсга тушди. «Сеҳр-

ли мўйқалам» оролчасида эса турли мавзуларда расм чизиш танлови ўтказилди.

«Моҳир қўллар» оролчасида болажонлар рангли қоғозлар, бисер ҳамда турли матолардан ўйинчоқлар тайёрлашди. «Пантомима» оролчасида «Маънавият ва маърифат» йўналиши сардори Саидазиз Ўлмасов барчанинг кўз ўнгида қулги ва аъло кайфият улашувчи «Қувноқ масҳарабоз» образида намоён бўлди.

«Билагон» оролчасида билагон болалар учун викторина ва қизиқарли тест синовлари ташкил этилди. Энг сўнги — «Жамалак» оролчасида эса қизалоқлар учун чиройли соч турмаклари яратилди. Шунингдек, тадбирда болажонлар иштирокида «Делфин», «Иссиқ картошка», «Сув остида гапирамиз», «Ҳар соҳадан бир шингил», «Ер ва осмон», «Энг катта шар», «Ким эпчилу ким чаққон?» сингари бир-бирдан қизиқарли ўйинлар ташкил этилди.

Тадбир сўнгида лойиҳа доирасидаги танлов ва интерфаол ўйинларда иштирок этганлар ҳамда оролча қаҳрамонларига «Камолот» ёшлар ижтимоий ҳаракати Шайхонтоҳур туман кенгашининг эсдалик совғалари топширилди.

Ушбу ноанъанавий тадбир ёшларнинг ижодий-интеллектуал қобилиятларини ривожлантириш ҳамда жисмонан чиниқтиришда муҳим омил бўлиб хизмат қилади.

Дилшод РЎЗИКУЛОВ,
ЎзДЖТУ талабаси

Hududlardan mujdalar

АНДИЖОН ВИЛОЯТИ

Вилоятда корхона, ташкилот ва муассасалар ўртасида мини-футбол бўйича ўтказилаётган «Камолот» кубоги мусобақасининг ҳудудлараро минтақавий босқичи бўлиб ўтди.

Унда Андижон вилоятининг Булоқбоши туман халқ таълими муассасалари фаолиятини методик таъминлаш ва ташкил этиш бўлими жамоаси, Наманган вилоятининг «Намангандонмаҳсулотлари» ОАЖ жамоаси, Фарғона вилоятининг «Фарғона-азот» ОАЖ жамоаси майдонга тушди. Мусобақа якунида мезбон жамоа биринчи ўринни эгаллади. Иккинчи ўринни Наманган вилояти жамоаси қўлга киритган бўлса, учинчи ўрин фарғоналик футболчиларга nasib этди.

Мусобақада иштирок этган барча жамоалар «Камолот» ЁИХ Марказий Кенгашининг диплом ва қимматбаҳо совғалари билан тақдирланди.

ҚАШҚАДАРҒУ ВИЛОЯТИ

Қарши шаҳридаги Санъат коллежида «Камалак»нинг митти юлдузлари» номли концерт дастури бўлиб ўтди.

Мустақиллигимизнинг 23 йиллиги олдида мактаб ўқувчиларининг ёзги таътилини мазмунли ташкил этиш, ёш иқтидор эгаларини кашф этиш мақсадида ўтказилган ушбу тадбир вилоят «Камалак» болалар ташкилоти ташаббуси билан амалга оширилди. Концерт дастурида «Камалак» болалар ташкилоти томонидан ўтказилаётган танловларда ғолиб бўлган ёш истеъдод соҳиблари чиқиш қилди.

СИРДАРЕ ВИЛОЯТИ

Гулистон маданият ва истироҳат боғида «Ҳашар — ёшларга ярашар» шиори остида акция бўлиб ўтди.

Акция иштирокчилари боғ ҳудудини чиқиндилардан тозалаш, дарахтларни оқлашди, шох-шаббаларни чиқариб ташлашди. Иштирокчилар ҳашардан сўнг мириқиб дам олишди. Уларга боғ маъмурияти музқаймоқлар тарқатиб, аттракционларда учиш имкониятини берди. Шу куни вилоят бўйлаб кўплаб хайрли ишлар амалга оширилди. Жумладан, камтаъминланган, боқувчисини йўқотган оилалар, уруш ва меҳнат фахрийлари ҳолидан хабар олинди.

2014-yil — Sogʻlom bola yili

Тиббий маданиятнинг аҳамияти

Мамлакатнинг жаҳон ҳамжамиятида тутган ўрни ва мавқеи иқтисодий омиллар билан белгиланади. Бироқ халқ ва миллатнинг, бинобарин, мамлакатнинг қудрати, потенциал имкониятларини кўрсатиб берувчи бошқа сабаблар ҳам бор. Масалан, аҳоли ўртасида тиббий маданиятнинг қай даражада шаклланишига қараб унинг келажagini тасаввур қилиш мумкин. Фарзандлари соғлом юрт қудратли бўлур, деган пурмаъно ҳикматнинг маъзини чақиб кўринг-а...

Аҳоли саломатлигини таъминлаш, ёш авлод ўртасида соғлом турмуш тарзини тарғиб қилиш бугун юртимизда умуммиллий ҳаракатга айланган, десак муболаға бўлмайди. Бу фақат мутасадди идора ва ташкилотларнинг, мутахассисларнинггина иши эмас, барчамизнинг бурчу вазирамиз эканини юртдошларимиз кундан-кунга яхшироқ англашмоқда. Тиббиёт муассасалари, уларда меҳнат қилаётган мутахассислар эса бу борада оддий кишиларга ўрнатилган бўлишлари, аҳоли ўртасида тиббий маданиятни шакллантиришда асосий ишни бажаришлари керак.

— Туманимизда 106та қишлоқ ва маҳалла бор, уларда истиқомат қилаётган салкам 130 минг аҳолига хизмат кўрсата-

миз, — дейди Деҳқонобод туман тиббиёт бирлашмаси бошлиғи Фанишер Умрзоқов. — Уларнинг соғлиғи ўзлари учун қанчалик зарур бўлса, биз, шифокорлар учун ҳам шунчалик муҳимдир. Аҳоли, айниқса, ёшлар ўртасида соғлом турмуш тарзини мустаҳкам қарор топтириш, зарур маслаҳатлар бериш ишимиз асосини ташкил этади. Негаки, касалликларга чора топиш мумкин, бироқ одамлар онгида тиббий маданиятни тўла шакллантирмас эканмиз, умумий мақсадларга эришишимиз душвордир. Юртдошларимиз соғ-саломат бўлсалар, энг муҳими, ҳаммиша тетик, дадил, соғлом бўлиб юриш учун нималар қилиш лозимлигини кундалик юмушларни билгандек билсалар, шунинг ўзи катта бахт.

Тумандаги Оққишлоқ, Торқапчиғай, Хўжабарлос, Хўжаипок, Қизилча, Дўконхона, Алмат, Оқсув каби туман марказидан узоқда жойлашган қишлоқларга юздан зиёд шифокор ва 1065 нафар ўрта махсус маълумотли тиббиёт ходими хизмат кўрсатиб келмоқда. Уларнинг кўпчилиги тажрибали, олий ва биринчи тоифали тиббиёт ходимларидир.

Фуқароларга 297 ўринли марказий касалхона, 150 қатновга мўлжалланган кўп тармоқли поликлиника ва барча қулайликларга эга 18та қишлоқ врачлик пункти, санитария-эпидемиология станцияси, кўплаб дорихоналарда хизмат кўрсатилаяпти.

Президентимиз ва ҳукуматимизнинг ғамхўрлиги туфайли аҳолига тиббий хизмат кўрсатиш яхшилашиб бормоқда. Биргина кейинги йилларда туманнинг ўзида «Саломатлик — 2» лойиҳаси бўйича 586 миллион сўмлик, «Саломатлик — 3» лойиҳаси доирасида 680 миллион 499 минг сўмлик тиббий асбоб-ускуналар келтирилди. Тиббиёт муассасаларининг моддий-техник базаси мустаҳкамланмоқда.

Марказий касалхонада қулайликларга эга бўлган

11та бўлим ишлаб турибди. Айниқса, Соғлом бола йилида тажрибали шифокор Хусан Норматов раҳбарлик қилаётган 47 ўринли болалар бўлимида ибратли ишлар амалга оширилмоқда. Шунингдек, терапия, неврология, шошилинч тиббий ёрдам, туғруқхона, реанимация, гинекология, диагностика, юқумли касалликлар, хирургия, тез тиббий ёрдам, физиотерапия бўлимларида беморларга алоҳида ғамхўрлик кўрсатилмоқда.

Саломатлик посбонлари орасида қирқ йиллардан бери фидойилик билан хизмат қилаётган қўли энгил шифокорлар анчагина. Тажрибали хирурглар Хуррам Зулфиров, Нормели Шарипов, олий тоифали шифокорлар Нурия Суярова, Моҳира Муҳаммадиева, акушер-гинекологлар Ҳаловат Эсонова, Маъмура Қўзибоева, тажрибали шифокорлардан Абдумалик Эгамшуров, Урол Мустафоев, Шавкат Амиров, катта ҳамшира Махсума Худоёрова, Лола Маҳмудова, Сайёра Саломова шулар жумласидан.

Шавкат КАРОМОВ,
«Turkiston» муҳбири

E'tibor

Кўнгиш кўзи очик бўлсин

Кўриш қобилияти чекланган бўлса-да, мутолаани севувчи, илму маърифатга ташна юртдошларимиз билан ишлаб шундай хулосага келамиз: гўзалликни кўриш учун кўнгиш кўзи очик бўлсин экан. Инсон камолотида муҳим ўрин тутадиган китоб билан дўстлашиш, уни ҳаётининг мазмунига айлантириш учун ҳам кўнгиш пок, унда яхшиликка интилиш туйғуси бўлмоғи керак.

Бугун мамлакатимизда эллик мингга яқин кўриш бўйича имконияти чекланган шахс (1-, 2-гурӯх ногиронлари) истиқомат қилади. Аксарияти ўқимишли, зиёли инсонлар. Уларнинг китобга, илм ўрганишга бўлган эҳтиёжларини қондириш мақсадида Республика марказий кўзи ожизлар кутубхонаси ва унинг тизимида саксонта ҳудудий кутубхона хизмат кўрсатаёпти. Уларнинг замон талабларига мос тарзда жиҳозланишига эътибор қаратилмоқда. Вилоят марказларидаги кутубхоналар компьютер воситалари билан тўлиқ таъминланган, туманлардаги кутубхоналарнинг эса етмиш беш фойида шундай шароит яратилган. Қолганлари ҳам шу йилнинг ўзида ахборот-коммуникацион тех-

нологиялар билан тўлиқ жиҳозланиши режалаштирилган.

Бу йил кутубхоналарнинг моддий-техник базасини яхшилаш борасида қатор ишлар амалга оширилди. Фарғона, Қашқадарё ва Сурхондарё вилоят кутубхоналарига алоҳида бино ажратилди. Қорақалпоғистон Республикасининг Кўнғирот, Жиззах вилоятининг Фаллаорол, Зафаробод, Жиззах туманлари, Андижон вилоятининг Олтинқўл, Марҳамат, Асака, Қўрғонтепа ва Бухоро вилоятининг Вобкент туманларидаги кутубхоналар учун қулай шароитларга эга бинолардан жой ажратиб берилди. Вилоят ва туманлардаги кўзи ожизлар кутубхоналаридан узоқда жойлашган аҳоли пунктлари учун кўчма кутубхоналар ташкил этилган. Фойдала-

нувчиларга хизмат кўрсатишни яхшилаш, керакли адабиётларни ўз вақтида етказиш, кутубхонага келиш имконияти чекланган (ногирон) фойдаланувчиларнинг уйларида китоб элтиб бериш учун барча вилоят кутубхоналарига «Дамас» автомобиллари ажратилган ва улар беминнат хизмат қилаёпти.

Албатта, соҳада ҳали қилиниши лозим бўлган ишлар ҳам йўқ эмас. Масалан, барча турдаги жиҳозлари янгилашишга муҳтож кутубхоналар бор. Уларнинг моддий-техник базасини яхшилаш, барча кутубхоналарнинг ўз биносига эга бўлишларини таъминлаш долзарб масалалардандир. Туман кутубхоналарининг кўпчилиги иситилмайдиган биноларда жойлашгани ҳам эътибор-талаб ҳолатлардан, деб ўйлаймиз.

Гулойим БЕРДИМБЕТОВА,
Республика кўзи ожизлар марказий кутубхонаси директори вазирасини бажарувчи.
Гулрухсор ҚУРБОНОВА,
кутубхона ходими.


E'lon

ТОШКЕНТ МОЛИЯ ИНСТИТУТИ ҚОШИДАГИ 2-АКАДЕМИК ЛИЦЕЙ ТЕНДЕР ЭЪЛОН ҚИЛАДИ

Тошкент молия институти қошидаги 2-академик лицейда ўқитувчи ва ўқувчиларнинг соғлом овқатланишини ташкил этиш мақсадида 2014-2015 ўқув йили учун 68,1 м² майдонли лицей буфетини ижарага бериш бўйича тендер ўтказилади. Тендерда иштирок этишга хоҳиш билдирган ташкилотларнинг ҳужжатла-

ри эълон чиққан кундан бошлаб бир ой мобайнида қабул қилинади.

Мурожаат учун манзил: Тошкент шаҳар Олмазор тумани Мойқўрғон мавзеси Хусункор кўчаси 5-уй. Тел.: (+99871) 227 92 73.



Ҳисобли дўст айрилмас

Аргентина ҳукумати қўшни мамлакат фондлари билан мамлакат қарздорлигини қайта кўриб чиқиш борасида келишувга эриша олмади.

Бу Аргентинада деярли дефолт (қарз олувчининг қарз олиш ҳақидаги келишув шартларини бузиши, қарз ҳажбуриятлари бўйича тўловларни ва бошқа шартларни бажара олмаслиги) ҳолати юзага келганини билдиради. Мамлакат иқтисодий вазир Аксел Киселиоф фуқаролар келажagini хавф остига қўймаслик мақсадида ҳукумат «йиртқич фондлар» билан битим имзолашганини маълум қилди. Эслатиб ўтамиз, дефолт ҳолати Аргентинада 2001 йилда ҳам кузатилган. Ушанда мамлакат ҳукумати 95 миллиард доллар миқдоридagi қарзини тўлай олмаган эди.

Янги кинопарк қурилади

Хитой ҳукумати кельт услубидаги кинопарк қуриш ва Канн кинофестивалига ўхшаш ўзининг халқаро киноанжуманини ташкил этилишини эълон қилди.

Анжи шаҳрида амалга ошириладиган лойиҳа учун ҳукумат тахминан бир миллиард доллар атрофида маблағ сарфлашни режалаштирган. Киношаҳарчани қуриш ишларида хитойликлар Канн кинофестивали ташкилотчилари билан ҳамкорлик қилади. Кинопарк ҳудудида махсус «француз майдони» ташкил этилиб, унда Франция тарихи ва маданиятига оид фильм ҳамда рекламаларни намойиш этиш кўзда тутилган.

Ҳаммаси ўзига боғлиқ

«Манчестер Юнайтед» клуби ва «Adidas» компанияси ўртасида тузилган ўн йиллик ҳомийлик шартнома келажagini маълум бўлди.

Унга кўра, ҳар йили «МЮ» 750 миллион фунт-стерлинг миқдорида маблағ олиши лозим эди. Аммо инглизлар келаси мавсум ҳам ЕЧЛга чиқа олмаса, «Adidas» бу маблағни ўздан бирига камайтиришини маълум қилди. Шунингдек, шартномада, агар «МЮ» премьерлигадан тушиб кетса, ҳомийлик шартномасининг бекор қилиниши ёки қуйи лигада ўтказилган мавсум учун икки баробар кам пул тўлаши кўзда тутилган. Мабодо, инглизлар ЕЧЛ ёки Англия кубогида ғолиб чиқса, қўшимча тўрт миллион фунт мукофот пули ҳам олади.

Янги тадқиқот, янги кашфиёт

Япония геофизик олимлари Ой ядроси суюқ қатлам билан ўралганлигини исботлаб беришди.

Ой ядроси ва қуйи мантия орасида ёпишқоқ қисм мавжуд бўлиб, у ядроси нотекис ёпиб туради. Ана шу муҳит суюқ қатламдир. Олимларнинг фикрига кўра, у туфайли зилзила тўққинлари сўнади. Юпқа суюқ қаватнинг пайдо бўлишида ой қаъридаги ишқаланиш сабаб бўлган. Яъни у ўз навбатида ердаги гравитация таъсирида содир бўлган. Мутахассислар энди ушбу назарияни фанга олиб кириш учун текшириши керак бўлади. Бироқ у тасдиқланган тақдирда ҳам суюқ қатлам тўрт ярим миллиард йил аввал Ер-Ой тизими шаклланишидан буён қотиб кетмагани ҳақидаги саволга жавоб топиб бўлмайди.

Интернет манбалари асосида Жавоҳир КАРОМАТОВ тайёрлади



Hunari borning xazinasini bor

Инсоннинг меҳри ҳатто темир-ни ҳам юмшатишга қодир. Хунари энг қаттиқ жисмларни ҳам «бўйсундиради».

Тошкентлик Исмоил Шукуров қарийб ўттиз йилдан бери темирчилик билан шуғулланиб келмоқда. Йиллар унинг кўлида оддий металдан қандай санъат ва

хунарамандчилик асарлари яратилганига гувоҳ бўлди.

Кўли гул хунараманд устахонасида устоз-шогирдлик анъанасига амал қилинади. Бугун отасидан темирчиликни ўрганаётган ака-ука Илхомбек ва Икромжон Иброҳимовлар бу хунарсирларини мукамал эгаллашга бел боғ-

лашди. Оилавий хунарамандлар ясаётган темирчилик буюмлари юртдошларимизнинг яхши кунларига хизмат қилмоқда.

СУРАТДА: ака-ука хунарамандлар иш жараёнида.

Рустам НАЗАРМАТОВ
фотолавҳаси

?

— Укам апрель ойида хорижга кетган эди. Яқинда унинг олдига бориб келиш учун аэропортга билет оламан деб борсам, чет элга фақат биометрик паспорт билан чиқа олишим мумкинлигини айтишди. Бунга уларнинг ҳуқуқий асослари борми?

Алишер, Нуробод туманидан

Саволга Нуробод туман ички ишлар бўлими ХЧК ва ФРБ бошлиғи Зафар Юсупов жавоб беради:

— Ўзбекистон Республикаси Вазирлар Маҳкамасининг 2014 йил 6 февралда қабул қилин-

1 savolga 1 javob

ган «Ўзбекистон Республикаси фуқароларининг чет элга чиқиши тартибини такомиллаштириш чора-тадбирлари тўғрисида»ги қарорига мувофиқ, Ўзбекистон Республикаси фуқаролари 2014 йилнинг 1 июлидан бошлаб чет элга фақат биометрик паспорт билан чиқишлари мумкин.

Бу борада авиакасса ходимларининг жавобларига эътироз билдириш ноўрин. Биометрик паспорт олишга улгурмаган бўлсангиз, ўзингиз доимий рўйхатдан ўтган туман Ички ишлар бўлими Хорижга чиқиш-келиш ва фуқароликни расмийлаштириш бўлимига мурожаат қилинг.

Туман, Анджион вилояти	Азиз неъмат	Шина идиш	Ёз ойи	Кимодди савдоси
1 9 8 7	3 2 4	Тахир, чучмал	Юк кутариш қуримаси	... Жонс (боксни)
4 6 1 4	6 3 1 4	Ишсиз, юмуш-сиз	12 ой	Сирт, ташқи томон
4 7 8 5	4 7 8 5	Аурагдор иш анжоми	Поён, чегара	3 5 6
8 9 5 1	8 9 5 1	Металл турп	Хар-тумал хайвон	8 7 2 9
2 7 6 1	2 7 6 1	Кимир-лаган қир...	Башқир-дистон пойтахти	3 4 4
Узбек шоири	Туп-роқ+сув	Зеб	Гувоҳ	2 7 8 8 7
Бедор, уйқусиз	Гувоҳ	Овчининг иши	Тил, лисон	8 7
				2 9 6 1 1
				9 6 1 1

Тузувчи: Фахриддин Раҳимов

Sport

ҲАҚИҚИЙ ШАХМАТ БАЙРАМИ

Норвегиянинг Тромсе шаҳрида ўтказиладиган XXXXI Бутунжаҳон шахмат олимпиадаси мусобақалари бугундан старт олиб, 14 августга қадар давом этади.

Мусобақалар ўн бир турдан иборат бўлиб, швейцарча тизимда ўтказилади. Турнирда уч минг нафар шахматчи голиблик учун курашади. Мусобақалар давомида FIDEнинг 85-Конгресси ҳам бўлиб ўтади. Унда 181 мамлакат миллий федерацияларининг тўрт юз нафардан зиёд вакили иштирок этади.

ИРОДАЛИ ҒАЛАБА

Қозоғистоннинг Тараз шаҳрида бўлиб ўтган эркин кураш бўйича халқаро мусобақада Ўзбекистон терма жамоаси вакиллари Дилшод Мансуров ва Ихтиёр Наврўзов мусобақа совриндори бўлдилар.

57 килограммгача бўлган вазн тоифасида гиламга чиққан Дилшод Мансуров мусобақа мезбони Сане Артасуни мағлуб этди ва Динмухаммад Кунаев хотирасига бағишлаб ўтказилган турнирнинг кумуш медалига эгалик қилди. Ихтиёр Наврўзов эса 65 килограмм вазн тоифасида рақибини енгиб, бронза медалини қўлга киритди.

Ўктам ОЧИЛОВ тайёрлади.

«TURKISTON» САВОЛ БЕРАДИ»

Медиа лойиҳамиз давом этади. Лойиҳа доирасидаги навбатдаги учрашув 2014 йилнинг 5 август куни «Камолот» ЁИХ Тошкент шаҳар кенгаши раиси **Элбек Шукуров** билан бўлиб ўтади. Сухбатдошимиз ҳақидаги маълумотларни www.kamolot.uz сайтида ўқишингиз мумкин.

Савол ва таклифларингизни savol@turkiston.uz электрон манзили ёки (+99871) 233-79-69 телефон рақами орқали кутиб қоламиз.

Энг қизиқарли савол ва таклиф муаллифларини совғалар кутмоқда. Ўз позициянгизни намён этишга шошилинг.

ЗУККО МУХЛИСГА САВОЛ:

Кўзойнакни ким, қачон ихтиро қилган?

Жавобингизни 5 август соат 16.00га қадар 233-79-69, 233-95-97 рақамларига кўнғироқ қилиб беришингиз мумкин. Тўғри жавоб йўллаган мухлислар номи газетамизда эълон қилинади.

Ўтган сондаги саволнинг жавоби: **Арахнология.**

Нишон туманидан **Шаҳзод Абраҳматов** тўғри жавоб йўллади.

YONDAFTARCHANGIZGA

Аёл — фарзанд тимсолида эрини, эр — фарзанд тимсолида хотинини севади; ҳар иккаласи учун ўша фарзанд — муҳаббатнинг ўзидир.

Ҳаёт